

頤

綵

堂

文

集

頤綵堂文集卷二

秀水 沈叔埏 埴爲

頌

聖主五巡江浙迎

鑾恭頌

謹序

臣聞治躋大凝被天和食地德河循軌海效靈蓋必久於其道而後觀厥成焉漢王褒云恩從祥風翔德與和氣遊太平之責塞優游之望得者煒乎煌哉徐徐于于至於今而晏矣粲矣稽古巡典赫胥氏歲省方觀民設教黃帝乘龍四巡南臨元扈合符於金山以觀其會顓頊高陽東

踣蟠木日月所照莫不砥屬往牒所紀遐哉邈矣嘗考釋
經者曰巡者循也狩者收也道德太平王者爲天循行以
收人也又曰一次巡守一次提攝整齊所以新新不已之
意舜五載一巡班固云三歲一閏天道小備五歲再閏天
道大備王者因天之道恩亦當竟也夏殷六年一巡鄭志
云取半一歲之律呂說者謂唐虞羣后四朝須四年而徧
故第五年乃時巡夏殷分五服建五長須五年而徧故第
六年而後時巡周十有二歲一巡說者謂周時文治漸成
禮文漸備所以十二年方舉巡守之事此成王之知時變
識會通也顧夏后元圭底績百歲涉江而傳子暨孫罔繼

舊服周詩時邁頌武般頌成而數傳以後僅詠車攻載籍
言時巡之盛繼序眇聞矧其爲攬賁紘於戶闥奠水土於
崇庠以迪

前光而

錫民極者哉我

聖祖仁皇帝如天之仁博恩廣施遠撫長駕六十一年中
六幸江南而五巡浙水四千祀以來禹跡復堯勳放用能
驅馳軒項趯趯殷周詩書稱述不足多也欽惟我

皇上崇效

天行繼繩

祖武踐阼以來閱四十五年無逸作所不息以誠邇自辛未之春肇舉南巡登稽山涖南鎮旣而丁丑壬午

翠華重幸

恩洽澤覃至乙酉而

鑾輅四巡日華雲爛寅望秩以協方社行慶惠以予黎元
荷歟盛矣惟茲三江兩浙澤國巨浸在吳則河在越則海
所在隄防捍禦費水衡以萬計前此

春巡四至月省時考歲獻厥功俾粒食之民耒耜從其宜
溝畎以其便故億兆依戀

聖主如我

聖祖常時腰臘禱祠輒謂我儕小人鄉連屬巷甘臥水行
而山處鹿聚而麋居居不知所爲行不知所之其孰能踰
越疆理攀陟

闕廷以仰見

萬年天子飲食寤寐延頸舉踵喁喁然望光

雲日歲逾一紀而星又再過矣我

皇上沿時省風考同遐邇薦饗於嵩岱綏福於清涼歲至
木蘭以行獮政時臨津淀以藏宣防曩者

考牧巡邊遠至多倫諾爾而

橋山展敬振轡

陪都比復

車駕三至矣豈邇在江介而憚於屢涉爲且兆姓戴

皇帝德淪浹肌髓垂五十年猶是戴

皇祖德也恭際

萬壽七旬敷天集慶

皇儀究焉

帝容展焉我民獲尸享盈寧人樂富壽且我

聖主紉華飭儉傳勅首塗車引避駢輟解凡諸宿頓費由
府實役不及民仍歲暢垓汧埏三吳告稔氣調時豫憲平
人富我南國黃髮守閭閻者食梁肉爲吏者長子孫皆蒙

賴

聖人恆久不已以煦嫗覆育之者也則迨其時哉爰是牙
節重臣聯牘固請

帝鑒其誠

詔以庚子孟陬日惟辛卯再舉南巡乃

申舊章下宸告一切郡縣之儲峙館宇之采椽重儆知顛
毋事踵增惟是

躬親而咨度者於治淮黃則清口所拓雖陶莊之引河暢
流而下游之填淤慮弗涇闢也於治海塘則潮勢所趨雖
鹽倉之漲沙如阜而北岸之柴工慮弗坂固也更沛

綸言預宣

曠典以育材俊造開

壽考之特科以藏富倉箱蠲直省之全漕其他截米平糶
減從恤役

恒憲遞頒

湛恩溥被萌隸奔走歡告屆日

建華旂鳴玉鸞越充濟徑桃宿隄繇息澤雁寧

視醴渠之安流紹

聖祖之明德沂江而南入延陵過茂苑濟具區道橋李憩
鳳山之嚮石以臨羅刹之濤江

觀乎三壘之拱翊見廣斥之成腴於是吳越耆艾咸聯襁
拊額而詠

神功歌

聖澤於以効華祝而洽

天歡溫溫乎懿哉

仁皇六至以續禹功

聖主五至而揚

祖烈繼自今四代巡狩之制或數或疎惟

皇上酌而行之是則千載所希值剖判之一會也是役也
升踐隄防親知劇易目營手畫爲河海定永圖焉所過境

內禋祀賚子如初禮神人胥悅民物交鬯而東南父老戴
帝德肖於

仁皇相與敬缶擊轅謳飲蹈舞而進曰我將臚卉木之暄
妍獻江海之珍錯以介景福而怡

天顏也我將啟神仙之窟宅萃巖壑之靈奇以展昌辰而
增

祉祚也則觀於千詩百賦

摘藻同春馬上船臂寸晷日授

天格瞻麗

睿才雄健曰我於

宸章之富而卜鴻庥之汪濊也

批荅章奏萬幾簡心廣求民瘼周咨疾苦夕爽旦加勞勗勤曰我於

勗幾之虔而知

慶基之昌熾也夫

德與

壽隆

福與

巡彙固非尋常篇詠足以鋪陳盛軌伏念

臣

以太學諸生

蒙

恩充補八旗教習憶昔

四巡江甸瞻仰

屬車兩試

行闕茲

臣

以寧母回籍祇迓

龍光倍切榮幸雖舛陋無文竊效衢歌巷祝擬頌九章雍容掄揚於

郵治之萬一謹拜手稽首以獻辭曰

天錫

皇壽而隆時乘六龍以巡我南國叶以省我春農河之翕落脉通海之恬波不溶越十有四載河海告成功來觀來

歌

聖人五臨

叶一章十三句

揚州之域德產殷富

叶

敦哉皇民奠哉豐國下舞上歌詠

仁蹈德

聖皇蒞止興利致福

叶

昔常來遊今豈不又

叶

天高聽卑

皇肯從欲

叶

乃舉五巡上章獻歲

叶二章十四句

帝臨河渠河伯導流

叶

清黃交滙水行舒舒水行舒舒詒

謀

祖則我

皇成之建萬世策江衢如砥其汙湜湜功卽康田美禾美麥惟

聖勤民惟勤克仁以渥我烝民曰自初巡以至於五巡三章十七句

民之庶矣富我民之富矣教我我

皇之來南人是荷吏之循矣字我吏之良矣長我我

皇之來南人是暇治醇化隆叶式單

皇心從以欲矣動以風叶矣是訓是行近

皇躬叶矣四章十句

帝觀海壺海若朝宗叶積渾成阜鴻波不興叶鳩茲工築

繕茲蒸薪後思是弭前功是循爰咨爰度來駐海壖

聖澤如海

聖政同春惠此南國

恩洽前巡

五章十
四句

在昔神禹腓脛腓胝俾乂水土龍負涉江受祿承祐我
后神聖紹衣率履曰惟

祖武

皇祖之南海隅化覃我

后之南禺功是參惟南人之多壽思

祖之六巡觀

皇之五巡祝

聖壽以萬春

六章十
六句

有億壽民來媚茲

一人媚茲

一人手芹負暄

予以帛綺授之杖几大酺以宴之民爵以等叶之偕爾多

士莘莘濟濟受

帝之祉孔燕樂豈小大拜手叶曰

萬年天子

七章十
四句

鳳山虎阜

天子之壽明水碧津

天子之春山有嘉卉水有游鱗有龍有仙有臺秩然春物
芳妍歌吹駢闐擊鼓吹幽樂郊之民戴以香盆擎以春酒
扶老襁幼祝

天子萬壽

八章十
六句

天子之壽南國是有我稼既阜叶我蠶既好叶我桑麻既

茂我婦子是保叶我秀民有造叶我老人壽考叶

觀我民五巡介

聖壽七旬萬有千歲以綏我南人九章十
二句

七

聖駕四詣盛京祇謁

祖陵禮成恭紀

擬七徵八首 代

乘輅使者于役青兗復

命繫問是時

上四舉上

陵之典

六飛在途告

東巡之禮藏望北鎮而

鑾紆有扈

雖儀曹過之使者揖而言曰子有樂於扈

遊

叶

乎願聞高譚於

盛軌將以次受而臚焉儀曹曰禱矣茂矣古罕儔

叶

矣鑠

矣融矣難究詞

叶

矣試簪毫以吮墨請更僕而停騶

叶

吾

爲子述子爲吾歌

叶

若乃

天作喬嶽

皇啟亨衢有使其道有歸其臺

叶

昔龍堆而雁塞今紫縣

與黃圖經一州之豐壤攬二縣之上腴遂行稼而

觀穫爭刈熟而斂疏欣

降康之有兆各夢協於維魚紛簡筭之秘路喧老稚以攜

扶

聖主方展期而湊爽因緩頓而周諷叶輕正供之全免陋
給復而蠲租

恩有加而必渥禮大備而如初晏粲兮老邊之一綫廣輪
兮千里而有餘漢拓畿於六葉周誇膺於一茶第較隆而
絜盛曾何足以相侔叶於是肅肅習習匪疾匪徐鳴鸞嘒
嘒駕龍衙衙音白灤而瀦以至於

舊都使者曰

二京之望

幸又歲星五周叶矣子言其大者厥禮何如
儀曹曰於昭我

清合撰

穹昊高辛高陽太皞少皞代生

聖神貺古猶眇遺甲十三乃敕乃敵耆定

戰功式廓

王造建

太室之一宮爰禡京而宅鎬陳嘉猷兮柔牲薦淥酈兮清醑積奕葉之熾昌邁

來昂之續紹縣瑞應於河源仰

德歆於秬草

聖主命典瑞以鑄成選卯人之地寶旣增輝於鉅牀用尊

頤綵堂文集

卷二

七

藏夫華藻會駢馬於載塗導

鑾輿而汎埽蒿柱茅茨昔焉祠禱黼構璿除今焉瞻眺鼎
祥烟之遍空鬱紫雲而旋繞珍

九廟之所弄綿萬禩而永葆使者曰此以徵

謨烈之詒久而光昭

上聲

儀曹曰東壁之光粲於龍尾

秘閣斯聳層櫺爰時潮潤同稱

奎文作記

叶

文寓簡編所存者理如日中天心傳在此惟

聖主之右文兼堯舜而與偕

叶

旣

繼序之不忘復

念典而無怠緬

光宅於陪京憶

文明之肇起乍偃伯於戎衣卽釋奠於璧水邠

雲穗之圖書備傳宣於

綸旨聚文館之英髦譯

翔鳳閣之書史際百年而後興乃

化成於悠久叶會四庫之畢功先七所而從事叶迫

雲構之落成逢

翠華之蒞止裨五嶽而佐三辰插縹緗而羅錦綈俾棧樸
之材蔚興菁莪之治就理精則道契淵源粗猶文讐魚豕

奚蘭臺之足稱况苟簿之徒紀使者曰此以徵

聲教之敷久而斐亶

儀曹曰大東左右巨水襟環渾來千里遼有雙源江安流
於粟末海帖浪於涯垠總滋培乎

福壤並演澗夫畿甸

叶

聖主乃特祠以報酌奉

成命於前巡衍靈長之一脈昭胖饗於千春或升香於高
阜或獻爵於重闔或遣吉林之告祭或正濟源之明禋迺
霓旌之四詣奉

屬車之清塵共薌其之飫沃同酒醴之苾芬分灌輸於田

畝奏猶翕於神絃瀆鬼川祇効靈而趨走谷王海若揚職
而後先下逮東梁之水利濟之川莫不稽我

王委沃我周原使者曰此以徵

懷柔之徧久而彌惇

儀曹曰國懋洪伐

帝疇嘉庸雲臺烟閣之像頒璜析珪之封享

殿廷而必與陪

陵闕而相從希風收之一德許稷契之匪躬溯

開基而佐命尤拓土而抒忠

聖主聽鼓聲而思將銘彝鼎而念功式斧堂之邱壟邀

莫醖於恩_叶因推恩於苗裔垂帶礪於無窮至若本支之
戚屏翰之尊_叶元祀篤弼周疆以宗共艱辛於百戰偕彪
炳於

一戎或宥往而復爵或賞延而承寵_叶萃賢藩於京邑乃
侑祠之特興_叶慶問平之合食偉褒鄂之圖容風受饗而
颺颺來功臣之蹈舞車扈隨而轡轡兆

國祚之永隆豈不動昭融於契合感呵護於
時乘_叶使者曰此以徵功載之敘久而彌崇

儀曹曰商都北亳維河景員_{去聲}周遷西關夾於二澗

濬京之築

高基是建海拱山環上游強幹粵自古初未篤

天眷臨洮起秦元菟築漢唐統安東句驪以竄遼金五京
三韓斯渙明置指揮設衛亦僅翼羅四城中山所贊邑邑
都都於今乃見塞有候人邊閉以晏曾共享夫救寧而遽
忘於修繕營大役於無爲豫巨防於無患紓民力以五年
展土功於三限叶盡麗譙之崔嵬迺峻堞之千萬形抱陽
而縈原勢崢嶸而峭岸儼參塗而夷庭復通關而帶閑任
弋山而漁澤咸獸依而魚物貂夸豐於挹婁楷較勁於息
慎爭棧壑而貢琛競梯山而納賁喜屏障之一新際金湯
之重煥使者曰此以徵佚道之民久而益勸

儀曹曰過矣樂浪作藩瀛裔戴切近

光榮同陪位君允傳恭臣知職勸祝

壽億齡呼嵩萬歲同我鵷鸞率彼魑魅跨險瀆以來賓自

真藩而奉使輕千里而齎持閱九秋而匪懈

聖主褒恭順之有恆勉忠貞之能摯煥

宸翰於日星頒

膚文於世守叶俾殷遺之俗知中國之

聖人衛滿之都頒

壽祺之

天篤叶他如札薩遊藩咸晚勳貴構幕偕來羶裘畢至譬

鱗集以仰流如麋羣而悉萃望

鳳蓋之葳蕤峙

龍旂之邳偲際

天閭之洞開瞻

雲罕之四涖隨有繹於會同循

訓行於輯瑞莫不凜虞芮之履庭懼防風之獲戾使者曰
此以徵遠人之柔久而漸被

儀曹曰亶亶我

皇烝烝追孝叶翹心孔殷羨思倍篤蔚爲

篇章溢於卷軸辭纒纒而洋洋思悠悠而翬翬境愈習而

愈親迹彌彰而彌熟優有見而愜有聞存以愛而著以慈
大

謨烈之

顯揚垂法守之卓犖

聖訓備而嘉言彰後昆裕而

前光迪叶阜帳綈衣之慕詠歎而有餘唐弓夏服之觀惻

愴而不足陳關風而韻凡幾疊寧忘賽斐羅丹紀德產而

美不勝收奚止黃參綠玉於是彙

四舉以編排仍分年以繕錄畀雲礽以

家法之良

詒孫子以君子之穀相與憬然悟

帝業之艱難而怵然謹

皇圖之續續使者曰大矣哉

文至矣哉

德叶此則

至誠不息之徵所爲以悠久相勗者也聞止於斯矣子又

何告敬獻歌曰

孝治昌兮通

神明叶兮崇本重舊萬葉光兮又賡載歌曰五雲翔兮山

蒼蒼兮

祚流衍兮

福滂洋兮

順綵堂文集卷二終

頤絲堂文集卷三

秀水 沈叔埏 埴爲

考

三墳五典八索九邱考

孔安國書序云伏犧神農黃帝之書謂之三墳言大道也
少昊顓頊高辛唐虞之書謂之五典言常道也八卦之說
謂之八索求其義也九州之志謂之九邱邱聚也言九州
所有土地所生風氣所宜皆聚此書也楚倚相能讀卽謂
上世帝王之遺書也又云孔子讀易道以黜八索述職方
以除九邱其言雖未必盡然

說本薛文清讀書續錄胡敬齋居業錄

顧經無

正文自來所解各殊余擇其與孔合者而其他紛歧之說亦資以考異焉周官外史掌三皇五帝之書鄭注卽靈王所謂墳典唐虞以前可考而知者踐阼篇黃帝顓頊之道在丹書武王所端纒東面而受於師尚父者也傳述少皞氏以烏紀官夫子所見於鄒子而學之者也外如呂氏春秋序意引黃帝誨顓頊語賈誼書修政引黃帝顓頊帝嚳語亦猶有存者小史掌邦國之志浚儀王氏謂卽九邱通鑑外紀所云人皇氏依山川土地之勢財度爲九州謂之九圍此引春秋緯文余所不取鄭語史伯曰平八索以成人韋昭注謂八體以應八卦也乾爲首坤爲腹震爲足巽

爲股離爲目兌爲口坎爲耳艮爲手足以證孔矣又如賈
逵之說三墳五典延篤張衡之說五典馬融之說八索並
與孔合夫所謂三墳者孔所據三皇已有文字且云書記
當時之事不可以後追錄若當時無書後代何以得知
其道而鄭注賈疏雜引緯讖以爲三皇無文五帝畫象世
本黃帝之史蒼頡始造文字此云三皇之書者以有文字
之後仰錄三皇時事暨班固馬融王肅皆以文籍剏自五
帝竝从康成據後錄定之言余竊以爲伏羲既已作易
子雲樓制卦本易則文字因之而生繼此代有衍譯故字
迂齋叻以孳生無窮爲義也至康成以伏羲女媧神農爲三皇帝

鴻金天高陽高辛唐虞爲五帝所依緯文又復乖舛諸儒
數三皇或取燧人或取祝融以配犧農數五帝皆自軒轅
不數少昊又世本帝繫大戴禮五帝德家語宰我問太史
公五帝紀皆以黃帝爲五帝孔獨不從又帝繫本紀家語
五帝德皆云少昊爲黃帝子青陽顓頊爲黃帝孫帝嚳高
辛氏爲黃帝曾孫堯爲帝嚳子舜爲顓頊七世孫無不以
黃帝爲五帝首者正義所謂原由世本經纂秦所亂家語
多肅私定大戴禮本紀出於世本以此而同耳實則孔之
三皇本於繫辭確不可易惟五帝之說與羣書互有參差
然晉皇甫謐撰世紀一依孔說異乎史記必非無所見而

云然也他如淮南子以八索卽八澤達言八索八王之法
九邱九州亡國之戒則未知八澤爲何地八王爲何人九
州於虞夏周何屬也衡言禮爲人防爾雅墳大防也書曰
典朕三禮三墳謂天地人之禮也八索周禮八議之刑索
空也空設之九邱周禮之九刑邱空也亦空設之夫杜註
九刑之書以左傳所引周公誓命當之且三辟興於叔世
皆非空設之書而獨取於周何耶融言三墳三氣陰陽始
生天地人之氣也五典五行也九邱九州之數也夫人爲
天地所生則未知氣所自分而九州之數又不知其何所
指也諸家各以意言更無正驗宜杜鎮南所不信直注云

古書名耳宋張天覺

商英

僞撰古三墳以山氣形別之以連

山歸藏坤乾傳之詭云得之泌陽民家元吳萊嘗辨之明

胡元瑞

應麟

謂出於毛漸

隋劉炫所上宋毛漸所傳

至紹興十六年臨川

吳德遠

沈

獻三墳訓義爲太學博士王之望所駁書遂不

傳此皆不知而作爲無稽之言者矣

明文淵閣考

明文淵閣故址山陽阮吾山司寇徧覽之博雅諸公皆無以答王文莊申光祿謂在大內亦臆度之詞司寇以爲今之內閣大庫彷彿近之當時新都楊文忠在閣升庵挾父勢屢至閣緝書攘取甚多又典籍劉祿舍人胡熙主事李

繼先奉命查對而繼先卽盜易朱刻精本觀此必非在大

內之中有同溫室

漢哀帝時徙溫室中書於天祿閣

而野獲編謂其制甚

隘牕牖昏暗白晝列炬當時掌管屬之典籍云云則與今日大庫形勢宛然如繪且禁城殿閣觚棱皆綺牕藻井浮恩玲瓏惟皇史宬爲明季藏本之地則磚簷石室穴壁爲牕蓋以本章重地防火爲先今大庫之穴壁甃簷較史宬尤爲晦悶則爲昔日藏書之所正與史宬制度相合司寇此言幾於揣測得之矣而若無其據予考王文恪震澤長語閣在奉天殿東廡之東文華殿之前前對皇城深嚴邃密百官莫敢望焉吏人無敢至其地閣中趨侍使令惟廚

役耳防漏洩也故事禁中不得舉火宣宗指庭中隙地置
庖自是閣老得會食中堂每列筵側坐而虛其中以俟臨
視太宗賜儒臣詩首云秘閣宏開當巽隅充棟之積皆圖
書仙家蓬山此其處上與東壁星相符罷朝閒暇一臨視
衣冠左右環文儒宣宗聽政餘閒數臨於此進諸儒臣講
論折衷親爲之銘有曰於昭天文燦壁奎國家書府此其
儀文淵之閣屹巍巍古今載籍靡有遺明臣如楊文貞士奇
曾進文淵閣書曰鄭端簡曉有直文淵閣表黃泰泉佐有
文淵閣登望詩顧文僖清高文端儀並有文淵閣賦張江
陵居馬文肅世奇並有文淵閣藏書記稱盛事焉又考志載

常熟張洪丹徒裴俊吉水陳誠俱赴文淵閣修大典懷安
黃童以楷書徵入文淵閣繕寫大典則知大典一書實成
於斯閣也正統時崑山夏景在文淵閣寫經顧考明代秘
書畧而不備官亦缺乏無常員然且藏之無幾而其所藏
者又皆禁而不許觀不過每歲一晾以防蠹朽而已以予
觀於今日之

文淵閣芸籤之富藻構之宏官制之詳化成之廣其規模
奚啻霄壤相懸哉

射潮考

辛巳冬學使晉寧李鶴峯先生補錄獻賦諸生以射潮

命題余閱吳越備史錢儼傳芳集及元劉一清錢唐遺事得其詳云

武肅王以梁開平四年八月築捍海塘初定其基而怒潮急湍晝夜衝激城下沙岸版築不能就表告於天云願退一兩月之怒濤以建數百年之厚業禱胥山祠云願息忠憤之氣暫收洶湧之潮爲詩一章函鑰置於海門云天分浙水應東溟日夜波濤不停停千尺巨堤衝欲壞萬人力禦勢難平吳郡地窄兵師廣羅刹名高海衆憚傳語一作報龍王一作神并水府錢塘借與築錢城因採山陽之竹令矢人造爲箭三千隻羽以鴻鷺之羽飾以丹珠鍊剛火之鐵

爲鏃旣成用葦敷地分箭六處幣用東方青九十丈南方
赤三十丈西方白七十丈北方黑五十丈中央黃二十丈
鹿脯煎餅時果清酒棗脯茅香淨水各六分香爐布置以
丙夜三更子時屬丁日上酒三行禱云六丁神君玉女陰
神從官兵六千萬人鏐以此丹羽之矢射蛟滅怪渴海枯
淵千精百鬼勿使妄干惟願神君佐我助我令我功行早
就禱訖明日募強弩五百人以射濤頭人用六矢每潮一
至射以一矢射至五矢潮乃退旣而潮遂趨西陵王乃運
巨石盛以竹籠植巨材捍之城基始定後建候潮通江等
城門其射潮箭在臨安府候潮門左手數步蓋塘成後遂

以鐵鑄成箭樣其大如柝作亭泥路之旁埋箭亭中出土外猶七尺許以示鎮壓之義然潮汎之來常失故道臨安府置一司名修江司馬觀東坡看潮詩自注云王嘗以弓弩射潮與海神戰自爾水不近城足爲之證案宋史馬亮傳亮知杭州先是江濤大溢築隄數年不就詔詰問亮乃褒詔作文禱伍員祠下明日潮爲之卻出橫沙數里隄遂成此則仿吳越王事而爲之者

本朝康熙間鹽官築塘當事曾做行之查他山

慎行

次韻屠

艾山中丞閱吾邑塘工紀事詩但祈河伯薪相屬或凱陽侯射可祛自注前此有用築河隄法課民間出蘆葦及遣

術士射潮者又武進趙恭毅中撫浙時易海塘土以石祭
江神海潮至竟工不逼岸孝感居艾山浙撫浙時中小壘
爲海潮故道頻年潮衝小壘山北爲患甚劇浙爲文虔禱
山北沙漲數十里水徙山南人獲利賴浙有詩云詎有虵
龍波底窟別開清淺鏡中天紀其實也然則仿而無效是
又存乎其人矣

朱子語類臨安鐵箭只是錢王將此搖動人心使神之
余竊以此語爲未然在易坎之彖曰水流而不盈行險
而不失其信故中孚至信可以及豚魚而涉大川也漢
永平十八年耿恭以戊校尉爲匈奴左鹿蠡王所逼恭

以疏勒城傍有澗水可固自金蒲城遷居此城匈奴復
來攻壅絕澗水恭于城中穿井十五丈不得水吏士渴
乏竿馬糞汁飲之恭仰歎曰昔貳師將軍拔佩刀刺山
飛泉湧出今漢德神明豈有窮哉乃整衣再拜爲禱水
泉奔出恭親自挽籠令士和泥塗城揚水以示虜又索
勒字彥義行貳師將軍事將酒泉敦煌兵千人至樓蘭
屯田起白屋召鄯善焉耆龜茲三國兵各千橫斷注濱
河河斷之日水奮勢激波陵曰隄勒厲聲曰王尊建節
河隄不溢王霸精誠渾茫不流水德神明古今一也勒
躬禱祀水猶未減乃列陣被杖鼓譟謹叫且刺且射大

戰三口水乃迴滅灌浸沃衍胡人稱神大田三年積粟
百萬又梁暉字始娥冀之後冀誅入羌後其祖父爲羌所
推爲渠帥而居此城土荒民亂暉將移居枹罕出頓金
城南山爲羣羌圍迫無水暉以所執榆鞭豎地以青羊
祈山神泉湧出榆木成林此並古人之以一誠孚水德
者當與錢王不殊也因考射潮事并及之

廣陵散考

晉書嵇康傳初康遊洛西宿華陽亭引琴而彈夜分有客
詣之共談音律因彈爲廣陵散聲調絕倫遂以授康仍誓
不傳人亦不言其姓字後坐呂安獄臨當就命顧視日影

索琴彈之曰昔袁孝尼嘗從吾學廣陵散吾每靳固之廣陵散於今絕矣顧凱之嵇康讚曰南海鮑靚通靈士也東海徐寧師之寧夜聞靜室有琴聲怪其妙而問焉靚曰嵇叔夜寧曰嵇臨命東甯何得在茲靚曰叔夜迹示終而寶戶解宋朱伯原長琴史云此說已怪不足據也知叔夜之意者惟唐之李勉乎考勉傳汧公自製響泉韻磬天下寶之不言其能廣陵散也張鷟文士傳亦稱康臨刑謂其兄曰向以琴來否兄曰已至康取調之爲太平引曲成歎息曰太平引絕於今日耶吳均續齊諧記王彥伯見一女子於吳郵亭女取琴調之聲甚哀雅類今之登歌曰此楚明

光也惟嵇叔夜能爲此聲則是廣陵散似卽太平引抑未知楚明光之又爲何曲也而世說載會稽賀思令常月夜臨風鳴絃忽有一人形貌甚偉著械有慘色在中庭稱善自云是嵇中散謂賀云卿手下極快但仿古法未備因授以廣陵散遂傳之於今不絕夫此聲之傳始如夢溪筆談所記中有數聲他曲皆無如潑擺聲之類是也顧其取義所在輾轉於懷究竟未得其解一日閱唐書韓滉傳滉子臯生知音律嘗觀彈琴至止息歎曰妙哉嵇生之爲是曲也其當晉魏之際乎其音主商商爲秋聲晉乘金運此所以知魏之季而晉將代也慢其纂絃與宮同音所以知司

馬氏之將篡也懿受魏明帝顧託反有篡奪之心自誅曹
爽逆節彌露王凌都督揚州謀立荆王彪母邱儉文欽諸
葛誕相繼爲揚州都督咸有匡復魏室之謀皆爲懿父子
所殺叔夜以揚州故廣陵地彼四人者皆文武大臣咸敗
散於廣陵始也止息者晉雖暴興終止息於此也嵇康琴賦若次
其曲引所宜則廣陵止息注應璩與劉孔才書曰聽廣陵之清散傳元琴賦曰馬融譚思於止息其哀憤
躁蹙憊痛迫脅之旨盡在於是矣永嘉之亂其應乎叔夜
撰此將貽後代之知音者且避晉魏之禍所以託之神鬼
也此如其音錄唐朱慶餘撰載崔蒨奴授其女甥箏曲有廣陵
散正商調二十八疊同爲商聲故箏曲亦襲此名益歎讀

書須字求其訓而知音者之尤難其人也顧貢父詩話春渚紀聞老學叢談並言漢魏時揚州刺史治壽春儉誕皆死壽春廣陵自屬徐州又劉潛琴議魏武平荊州得漢雅樂郎杜夔爲太樂令妙於廣陵散康就其子猛求得此聲在夔已妙此曲則慢商之聲似不因廣陵興復之舉不成而製曲沈存中云或者康借此名以諷諷時事散取曲名廣陵乃其所命相附爲義此言當不虛耳又按宋志有李約琴調廣陵散譜一卷而樓攻媿得廣陵散于盧子嘉以此曲多潑擺聲二序正聲亂聲或以此始皆以此終小序爲一曲權輿聲乃發於五六絃間疑若不稱王明之爲作

小序獨起以潑灑雍容數聲然後如舊譜遂亟傳之且云
邪婆娑難得屈柘急遍而得其尾今廣陵不假他曲而得
其首證唐李琬意盡聲不盡之說此出後人所作未必有
當古音因爲拈出作考他日過阜城尚當訪亭之故址一
再低徊耳

釋

釋削

考工記築氏爲削長尺博寸合六而成規註今之書刀說
者謂康成以漢法況之言書刀亦然非削不可以他川也
案書刀川以刻字亦以除字故曰筆則筆削則削左傳云

削而投之後漢書楊由傳風吹削肺蓋言削札牘之柿也
王褒僮約曰書削代牘蘇竟書云摩研編削之才皆其證
也漢蕭曹皆秦刀筆吏師古曰刀所以削書也古用簡筆
皆以刀筆自隨又案西京雜記子雲懷鉛提槧從諸計吏
訪殊方絕俗之語作方言子雲荅劉歆書云雄常把三寸
弱翰齋汕素四尺以問其異語歸卽以鉛摘次之於槧惟
書刀可以滅青削槧則雄時猶用削也賈公彥疏古者未
有紙筆以削刻字至漢雖有紙筆仍用書刀是古之遺法
也至其形製則疏曰反張爲之謂若弓之反張以合九合
七合五成規也王氏曰合六削而圍之其執圓而成規馬

氏諸家亦以爲偃曲卻刃是也記又曰築氏執下齊金有六齊五分其金而錫居二謂之削之齊註多錫爲下齊疏四分以上爲上齊三分以下爲下齊王氏謂凡以金爲器必濟之以錫以柔戛而濟堅剛則其爲器也不折以青白而濟赤黑則其爲色也明皙削以制書欲其堅韌不脆其用錫宜多也按本草鉛謂之黑錫寶藏論東陽黑錫可以用銅則六齊之錫卽鉛也鉛鐵通謂之錫銅之初出於礦色皆紅古曰赤金以鉛和之則黃故記削曰欲新而無窮做盡而無惡先後鄭以爲鋒鏑之利常如新其刃脊雖至做盡不偏索無瑕惡王氏謂此材美工巧之効所謂魯之

削不過也又少儀刀卻刃授穎削授拊鄭謂穎環也拊把也釋名曰刀到也其末曰鋒若鋒刺之利也其末曰環形似環也然則直而本環者刀也曲而本不環者削也考徐鍇說文繫傳削从刀肖聲者輒也一曰析也刀之匣也其書刀削簡牘者从息雀反偃月形也孔穎達謂削爲曲刀是也戊戌秋闕班蘭臺集中云竇侍中遺仲升瑊皐削一枚金錯半垂刀一枚一時未得刀與削之辨近戴氏震考工記圖亦未盡合因考諸傳記知削之體蓋曲而有把者作釋削

論

六國論

當秦之隆天下莫不恐懼會盟而謀弱秦厭其暴而幸其
速亡而所恃以與秦爲難者惟有六國爲六國計者當同
心并力以伺秦之隙而攻其不備而不可割地以賂秦夫
割地以賂秦非不欲姑爲餌敵之術卒之自絕其援其勢
遂僂焉如不終日而國亦見并吞於秦此論六國者當綜
攬當日之大勢而爲之策萬全也六國中惟三韓當秦之
衝以控引燕趙中山而蔽遮宋魏與衛爲韓計者扼吭拊
背以與秦相周旋俾不得尺寸逾函谷關深溝高壘嚴兵
而固守俟其旣倦疲於瞻顧之不遑而後合與國圖之不

乘之以險而薄之於危不止彼無所恃其百二之雄而我
得以立萬一之效豈真如負嵎之虎莫之敢撓哉而燕趙
中山又宋魏衛之所恃以爲外援者也蓋宋魏衛處中原
腹心之地膏野千里帶甲百萬外有所恃以無恐則與關
隘收指臂之使而於藩籬得臂齒之依使黔首無西顧之
憂而戎馬藉南紀之壯而又得燕趙中山犄角之一呼
而肆應熟操而猝發不數十年汧渭皆牧馬之場而彎弓
報邯鄲之怨矣且也秦自穰侯專國事會可乘商鞅執政
峻急自喜內訌者木壞城峭者必崩蹈瑕候間觀釁而動
又實無可失之機哉計不出此簧鼓于一二辯士之口奔

走於縱橫捫闔飛鉗揣摩朝三暮四狙公之術以與秦相
抗稍不得逞卽舉而委之至出於不獲已最下之策舉平
日當秦一面者委之以飼餓虎夫虎狼無厭之欲至割地
以啗之而六國之亡不旋踵而可待其勢豈遂自取敗衄
而止歟雖然當日稱富強者莫如秦而亞於秦者又莫如
楚誠得韓以抗秦有燕趙中山以屏中原而又南結於楚
西合隴蜀之衆以夾攻秦秦豈遂成不拔之基哉吁金繒
割壤此後世偏安偷活不保旦暮之所爲而不意六國之
先蹈之也剝肉以補瘡支左而屈右觀六國之亡吾不得
不以儀秦爲戎首也

周世宗論

余既閱子萬周世宗論喜其筆端闡爽而於天人興廢之故未及推闡精微因復拈此以瑩其疑

讀史至五代分裂之餘而歎大寶之如弈棋改玉之如乘傳也天未厭亂人不悔禍度必得漢光武唐太宗其人乃始定於一耳不然如世宗者亦可謂英主誼辟矣而祚薄悍戾運移黠檢豈非氣數使然歟世宗以晉藩入繼周統鑒太祖養成王峻王殷之惡致君臣之分不終故高平之役轉敗爲功首誅樊何威令一仲能使宿將用命情卒致力南割江淮西克秦鞏北下三關皆躬履行陣應機決策

其削平天下之志亦槩可見矣間嘗迹其所當興者甚鉅而卒不足以興周者其故甚微微合五季全局觀之有不能釋然於眷顧之獨私也其用兵也簡閱軍實號令嚴明曰兵務精不務多農夫百未能養甲士一奈何浚民膏澤以養無用之物斯其爲十萬橫磨劍何如哉其用人也命趙匡胤李重進以爲將王朴王處訥竇儼以作律厯定禮樂如趙普曹彬竇儀輩皆宋祖心膂而其始並顯於周彼梁唐棄王彥章用趙巖張漢傑因宦者李從襲等殺郭崇韜與藥蘇合之丸而取咄咄之轉矣其愛民而知本也親錄囚於內苑頒均田於諸道刻木爲農夫蠶婦置殿廷貸

淮南饑則曰民吾子也子倒懸而父爲之解安在責其必償也豈僅能誦賣絲羅穀之詩已耶而余所爲卓絕者毀天下銅佛像鑄錢曰佛幻妄身世而亟利人使其真身尚在苟利於民猶不惜割截豈惜此銅像云云則惟唐武宗庶幾同之而憲宗懿宗所不悟也然則周易以亡也昔杜太后疾革遺命宋主曰汝知所以得天下乎正繇周世宗使幼兒主天下耳若周有長君汝安得至此且曰國有長君社稷之福也論者謂杜后惟據一時目擊之見造此厲階之說蓋黃袍加身去黃旗被體時未幾耳郭威取天下於孤兒寡婦再傳而失亦如之其殷鑒矣雖然成王之爲

孺子周室亦幾岌岌矣使無周召以爲之佐抑恐問鼎請
隧之不待東遷也然而卜世卜年卽無周召有可共信者
何則其所積累然也柴守禮故嘗殺人犯法無足論威之
將大軍入迎春門也劉旻亦欲起兵南向李驤嘗說旻曰
視郭公之心終欲自取公不如疾引兵逾太行據孟津俟
湘陰卽位然後還鎮則郭公不敢動矣否則且爲所賣向
使劉旻果聽驤言則天子正不必侍中爲之也威詭得之
亦幸矣逐鹿爭雄得馬非福世宗有見於此用是孜孜圖
治惟恐失墜其語唐鍾謨曰人生難期至於後世則事不
可知可及吾時治兵修守備爲子孫計而宋主亦曰有天

命者任自爲之何其相照合耶嗟乎氣運必至厯數自在
當李唐之末建號壹呼魚鱗雜襲亦日月之餘光耳天生
藝祖非必卽光武太宗也然而素有大志其母固知之矣
且曰天子置身兆庶之上若治得其道則此位可尊苟或
失馭求爲匹夫不可得是言也義方哲命不挂過矣則或
者論謀之遠誠有非朱五經行誼李克用三矢可樂論者
顧其蓄積如何史未及備著之耳故曰帝王之興自有天
命求之亦不可得拒之亦不能止觀於周世宗以峻法繩
羣臣而不能害太祖又何疑末帝之不足存梁明宗之不
足興唐也耶他日世宗嘗召陳希夷問以飛升黃白之術

搏曰天子當以治天下爲務安用此爲及聞宋祖代周驚
喜隆驢曰天下於是定矣此則天道元遠難以一二而窺
測也

元明辨亡論

元世祖肇興朔漠明太祖崛起布衣兩朝創業之主奮蹟
雖異英武畧同且俱得賢后內助雲龍風虎又不乏人宜
其旋乾轉坤後先接迹也所惜者一則甘受阿哈瑪特
阿合之蔽致陷前星一則罔燭胡惟庸之奸貽禍元嗣書
曰知人則哲不如是矣元之仁宗明之仁宣皆守文令主
享國不永未臻上理然元仁宗舍姪立于忍心負兒傲宋

太宗渝金匱之盟天亦不佑其嗣使大寶卒界武宗之子
孫較之靖難之師惠帝自啓其釁焉能邀天眷之回乎唯
改玉之際一隕淫虐一死義此其食報有繇當卜世之初
規模氣象蓋已迥不相侔矣綜而論之元政之失病在重
釋輕儒明祚之亡病在右文左武元有天下卽知崇奉孔
子尊爵顯號恤嗣追封樂用登歌戶增灑埽豈非道隆之
候乎無如尊信沙門遣官學佛建寺寫經司空司徒之官
帝師國師之號如嘉木揚喇勒智舊作楊璉真年札克喇錫結
琳沁舊作璉真吃刺思伽璉真之黨流毒無極厥後天魔一舞而九有
以亡至元之初求才甚急蒙古色目勸學維殷然歷三主

四十餘年始詔行科舉一歲僅得三十餘人迨後至元而罷之者五年許有壬力爭不能遽復以故朝多倖位莫與圖治野有遺賢不樂爲用雖襲正統未滿百年其明驗矣明興卽詔求遺書定取士之法不欲倣漢高提三尺取天下徑可馬上治之故三百年中官人必科甲宰相盡讀書人文雅之盛非不炳焉及其流弊帥臣專閫倚若長城一書生持尚方劍斬之如兒戲賀風子死熊廷弼毛文龍相繼受戮而邊事不可支矣尤可恨者寵任宦官權侵宰執甚於漢之十常侍唐之北司如元代李邦寧之釋奠續元暉之文階殆百倍焉土木之變誰爲戎首元氣國脉斲喪

僅存至逆瑾擅政委鬼當頭倒持太阿侮弄神器幾無天
日矣中間藉以濟事者惟張永一人其先後爭光史冊者
亦惟雲奇王承恩而已此又立國者理亂之定軌不可不
察也實則兩朝開創之後君德相業比於漢唐北宋亦寥
寥矣

頤綵堂文集卷三終